

Yëkkuö kit Pablo tö Colosas wakpa a Colosenses

Mik Pablo tö yëkkuö i' kit eta ie' tso'ia wötëulewā Roma s'wöto wé a. Wes ì bak ie' ta e' tso' kitule Hechos 28.17-31 e' ki. Pablo wák kè wā Jesús tté buaë pakane Colosas. Wëm eköl kiè Epafra, e' tö Colosas wakpa a ipaka'. E' ukuöki ie' dë'rö Pablo weblök s'wöto wé a ta ie' tö Pablo a ipaké tö Colosas wakpa shua kabene tso' taië.

Epafra tö ie' a ipaké tö pë' wele tso' s'wöbla'uk Jesús tté wa erë kè dör yësyësë. Pë' ñe'pa tö s'wöbla'weke tö Skëköl kè wā íyi kos yöne Cristo wa. Ñies ie'pa tö icheke tö Jesús kè dör kékëpa taië ese. E' skéie Jesús mik erblökwakpa kawöta tkinuk bua'ie ì ki Israel aleripa tkirke ese ki, es ie'pa tö s'wöbla'weke.

E' kueki Pablo tö yëkkuö i' kit ñippoie ie'pa ñekkëpa ta Jesús tté buaë tsatkoie. Ie' tö ichè tö Jesús è a se' tsatkërmi. E' kueki Skëköl tö ie' tkë'ka sulitane ena íyi ulitane tsata. Ñies ie' ichè tö ì kkacheke pë' esepa tö e' kè dör ñie bua' ena e' kè a se' tsatkënuke. E' kúie ta ie' tö ikkaché tö wes se' kawöta senuk Skëköl wörki.

Shke'wè

¹ Ye' dör Pablo. Skëköl wák er wa ye' dör Jesucristo ttekölpa tsá, e'pa eköl. Ñies s'yami Timoteo e' tso' ye' ta íe.

² Ye' tso' yëkkuö i' shtök a' dör batse'r serke Colosas e'pa a. A' dör s'yamipa e' tkëulewā darërë Cristo mik. Skëköl dör S'yé as e' er buaë chò ena sene bèrë mù a' a.

Pablo tö wëstela ché Skëköl a ie'pa dalërmik

³ Kεkraë mik sa' tö ikieke Skëköl a a' k_i, etā sa' tö wëstela cheke ie' dör Skëkëpa Jesucristo Yé e' a a' dalërmik. ⁴ Sa' tö a' tté ttsé tö a' tso'ia erblök buaë Cristo Jesús mik. Ñies sa' tö ittse tö a' tö s'batse'r malepa kōs dalëritseke buaë. E' kuek_i sa' tso' wëstela chök ie' a a' dalërmik. ⁵ Mik Jesús tté buaë mok_ie e' dë' a' ska' kuaë, etā a' tö ittse' tö Skëköl wā ì buaë tso' blëule a' a, e' tso' a' panuk ká jaì a. E' wā paneke a' tö kröröe, e' kuek_i a' erblöke Cristo mik ena a' ñi dalëritsöke buaë kεkraë. ⁶ Ttè buaë e' pakarke taië ká wa'ñe, e' klö'weke pè' tö taië. E' tö ie'pa er mane'weke as iser buaë yësyësë. Es ñies ibak a' tā kuaë mik a' tö ittse' tā iklöo'mi mok_i tö Skëköl er buaë ché se' a Cristo batamik. Kuaë dò i'ñe tā tté e' wakaneorkear buaë a' shuā. ⁷ Ttè e' paka' Epāfras tö a' a, ie' dalër taië se' éna. Ie' dör Cristo kanè méso wēs sa' es. Ie' dör Cristo kanè méso yësyësë a' kimoie. ⁸ Ie' wā a' tté de sa' ska' tö a' tö sa' dalëritseke taië Skëköl Wiköl wa.

⁹ E' kuek_i mik sa' tö a' tté ttsë' kuaë, etā sa' utmi S'yé tā a' k_i. E' kè olo'yeta' sa' tö dò ikkë tā. Sa' tö ikiear Skëköl a tö ie' Wiköl tö a' er ñi'ú kabikeitsoie buaë, as ì kiane ie' k_i tö a' iwè e' wā ar buaë a' éna. ¹⁰ E' ane buaë a' éna, e' tā a' serdaë buaë yësyësë wēs wépa dör Skëkëpa Jesús icha, esepa ké senuk es. A' serke es, e' tā ì kōs weke a' tö, e' wër buaë ie' wa. Ì buaë kōs weraë a' tö taië wēs kal wör taië buaë es. Ñies wēs Skëköl dör, e' wā k_i ar michoë a' éna buaë. ¹¹⁻¹² Sa' tö ikieke S'yé a tö ie' tö a' er diché iö, ie' olo taië, ie' diché taië, e' wa. Es idir, e' tā a' weirke kōs e' dalë'ttsërmi a' a er bua' wa. Ñies ì kōs wé S'yé tö a' a, e' k_i wëstela cheraë a' tö ie' a ttsë'ne bua' wa. Ì tso' ie' wā mè se' dör ie' icha batse'rpa e'pa a ilo bur taië e' a, e' yök a' yuétkeitö as idò a' ulà a ñies. ¹³ Ie' tö se' yéttsā ì sulu kōs dör wēs stui es, ese ulà a tā se' tsëmiitö wépa blúie ilà dalër iéna e' tso' esepa k_ie. ¹⁴ E' batamik se' tsatkéitö

ena se' nuì olo'yéitö se' kî.

Skëköl er buanene se' kî Cristo batamik

¹⁵ Skëköl kè wërta'wà, erë Cristo wa ie' e' k kayë' s' ditsö a. Kam íyi ulitane yör, e' yöki Cristo tso'tke. Ie' dör íyi ulitane kos e' tsata. ¹⁶ Ì kos tso' ká jai a ena ká i' a, e' yö' Skëköl tö Cristo ta ñita. Ì wërta'wà, ñies ì kè wërta'wà íyi wökirie ena íyi këkölie ena íyi wákie wà diché ta' ese kos yö' ie' tö Cristo ta ena Cristo kíkoka. ¹⁷ Kam íyi ulitane yör, e' yöki Cristo tso'tke. Íyi ulitane yöne ie' ta ñita ta ì'ne ta e' kos kicha a'tser ie' wà. ¹⁸ Ñies se' dör ie' icha, e'pa wökir ie' dör. Se' dör wes Cristo wák chkà es, eta ie' dör wes s'wökir es. Ie' kötewà, e' shkenekane se' tsáie as ie' dö íyi ulitane tsata. E' kueki ie' dör se' sene michoë, e' wì kicha bua'ie. ¹⁹ Wes Skëköl dör, e' kos wënewà Cristo kî, es Skëköl tö ibikeitsbak. ²⁰ Ñies ie' tö ibikeitsbak tö íyi ulitane tso' ká jai a ena ká i' a ena ká wa'ne e' dörane ie' ulà a Cristo batamik. Es ie' tö se' er bua'wéne ie' wák kî Cristo kötewà krus mik, ipé tene taië se' nuì skéie e' wa.

²¹ Kenet se' bak ì sulu wamblök ena ì sulu bikeitsök, e' kueki se' bak Skëköl bolökpa siulettsa bánet ie' yöki. ²² Erë ie' tö se' er bua'ne ie' kî Cristo kötewà se' nuì skéie e' wa as se' döwà ie' wörki batse'r, kè kî ì sulu ta, kè kî ì nuí ta'. ²³ Erë se' kawöta e' tkökwa darërëë kekraë se' erblò Cristo mik e' a. Ttè buaë ttsë' a' tö wà paneke a' tö e' kè olo'yar, e' ta iwà döraë a' ulà a. Ttè buaë e' pakane sulitane a ká wa'ne ñies ye' tso'ñak ipakök.

Kanè mène Pablo a

²⁴ Erë ye' weirke a' dalërmik, erë ye' ttsë'rke buaë. Cristo weine ie' icha dalërmik. Ie'pa dör wes ie' chkà es, e' kueki ie'pa weirke e' dör wes ie' wák tso'ia weinuk es. E' kueki ye' weirke kos a' dalërmik, e' dalë'ttsök ye' tso'.

Es ye' tso'ñak weinuk Cristo ta. E' tö ye' ttsë'weke buaë.
²⁵ Skëköl tö kanè mé ye' a Skëképa Jesús icha e'pa kanéuk.
 Ie' tö ye' patké ie' tté buaë kōs e' pakök a' a. ²⁶ Se' bak
 ká iaiäë, e'pa yöki tté buaë e' bak blëulewā, erë ìñe ta
 ikkayëne ie' icha batse'rpa a. ²⁷ Ie' tö ibikeitsbak tö tté e'
 kkacheraë ie'pa a. Ttè e' dör buaë shütëë, e' wa ie' er buaë
 chömi pë' kōs kè dör judiowak esepa a. Ttè buaë blëulewā,
 e' dör tö Cristo tso' se' er a, e' batamik se' dōrañak Skëköl
 olo tā' taië, e' ska'. E' wā paneke se' tö kröröë.

²⁸ E' kuëki sa' tö Cristo tté pakeke sulitane a. E' wa sa' tö
 sulitane patteke wöbla'weke kabikeitsè buaë yësyësë wa
 as sa' tö ie'pa kōs mù Skëköl ulà a yöuletke buaë batsulewā
 Cristo ta ñita. ²⁹ E' kuëki ye' e' tkéwā darërëë kanëblök
 diché taië meke Cristo tö ye' a, e' kōs wa.

2

¹ Ye' kī ikiane tö a' wā ijcher tö ye' tso' kanëblök darërëë
 a' dalërmik kè shtrirtā'wā. Ñies ye' tso' kanëblök s'yamipa
 serke Laodicea e'pa dalërmik ena s'yamipa malepa kè wā
 ye' suule, e'pa kōs dalërmik. ² Ye' kanëblöke darërëë ie'pa
 dalërmik as ie'pa er diché kī iër buaë, ñies as ie'pa kī ñi
 dalëritsò taië wës s'yamipa ekka ñi dalëritsò es. E' dör es,
 e' tā tté buaë blëulewā Skëköl wā kuaë, e' wā kōs ardaë
 ie'pa éna buaë. Ttè buaë e' dör Cristo wák. ³ Skëköl erbikò
 kōs, ena Skëköl wā íyi jcher kōs, e' tso' Cristo a blëule wës
 íyi bua'buā tuë darërë blësö es. ⁴ Ye' tö a' a ichè es as kè yi
 tö a' kītö'ù tté ttsër buaë, erë kè dör tté moki, ese wa. ⁵ Ye'
 wák kè ku' a' tā, erë e' dör wës ye' wák tso' a' tā es. Ye' wā
 ijcher tö a' e' tkéwā darërë ñikkëë a' erblò Cristo mik e' a
 wës wák eköl è es. E' tö ye' ttsë'weke buaë.

Sene pa'ali Cristo a

⁶ A' tō Jesucristo klö'wétke e' kékölie, e' kuëkî a' senú wës ie' kî ikiane es. ⁷ A' e' tkówā darërëë ie' mik wës kal wì kicha klörwā es. A' talanú ie' mik wës kal talar iwí mik es. A' kî erbló ie' mik kékraë wës a' wöblaone es. Wëstela mú kékraë ie' a.

⁸ A' tso' erkî as kè yi tō a' kîtö'ù ttè kè wà tã' ese wa. Ttè e' ttsër buaë erë iwà kè dör mokî, ese dör s'ditsö ttè è. Ttè ese kôs pakane'bitü ká iaiäë, e' dör ttè èse tso' ká i' kî ese kè idör Cristo ttè. ⁹ Cristo dör s'ditsö erë wës Skëköl dör, e' kôs wënewā ie' kî. ¹⁰ A' batsulewā ie' mik, e' kuëkî kè ì skà kianeia a' kî Skëköl wörkî. Íyi wökir wā diché tã' kè wërtã'wā ese kôs tsatã' ie' dör. E' kuëkî kè a' e' kîtö'uk ttè kuã'kî wa.

¹¹ A' batsulewā Cristo mik, e' tō a' wák dër suluë yéttsã. Es ie' tō a' wakyué a' er a iwà kkachoie tō a' dör ie' icha. E' dör wës sa' judiowak wöblar iwëpa tottola kkuölitla ttök tsir es iwà kkachoie tō ie'pa dör Skëköl icha. ¹² A' tō iklö'wé mokî tō Cristo shkeo'kane Skëköl tō idiché taië wa. E' kuëkî mik a' wösune, etã e' dör wës a' wötënewā ena a' shkenekane Cristo tã es. ¹³ Keñet tã a' dör ì sulu wamblökwakpa, e' këwö ska' tã a' kè dör Skëköl icha, e' kuëkî a' dör wës s'duulewā es ie' a. Erë ie' tō a' shkeo'kane, sene mokî méitö a' a Cristo tã ñitã. Sene sulu e' nuí kôs olo'yéitö a' kî. ¹⁴ Ie' ttè dalöiëno, e' dalöseowā se' tō, e' nuí kôs e' kî se' kkatëne. E' dör wës se' nuí kôs tso' kitule yëkkuö kî es. Erë ie' tō e' nuí kôs patuéttsã Cristo kôtewā e' batamik. E' dör wës ie' tō se' nuí yëkkuö wötë'wā krus mik Cristo tã ñitã es. ¹⁵ Cristo batamik ie' tō íyi wökir ena íyi wák wā diché tã' kè wërtã'wā esepa diché yë'lur. Ie' e' ali'kã ie'pa kî tã ijaëo'itö wës s'klöulewā ñippè shuã jaëwë sulitane wörkî yi e' aléka iki e' tō es.

Ì tso' ká jai a ese kî a' er múwā

¹⁶ E' kuëki kè yi kar a' kkatök chkè ki di'yè ki. Ñies kawö tkö'wëke judiowak tö duas bit ena si' pa'alí bit ena eno diwö bit ekkè, ese kè tkö'wè a' tö e' kè ki yi kar a' kkatök. ¹⁷ E' kos me'atbak Skëköl tö ie'pa a iwà kkachöie tö ì weraë Cristo tö mik ide etä. Erë Cristo dë'bak. Es ttè e' kos wà tka. E' kuëki ttè dalöiëno këchke ese kè dalöiaria. ¹⁸ Wépa e' ò tö ie'pa dör pë' buaë ser bèrè, esepa tö Skëköl biyöchökwakpa dalöieke. Ñies ie'pa e' chò tö Skëköl tö íyi kkacheke ie'pa a kabsueie. E' wa ie'pa e' ttsökeka taië. Erë ie'pa ttè kè wà tã', e' dör iwákpa kabikeitsò è. Kè a' e' muktsa e' kitö'uk ie'pa esepa ttè wa. ¹⁹ Ie'pa esepa kè ku'ia e' batsökwa Cristo dör s'wökir e' mik. Cristo dör wes s'wökir es, etä se' dör wes ie' chkà es. Se' wöbla tã', se' kukuña tã' ena s'yese skà tso' taië kua'ki kua'ki, e' kos iëulewa buaë ñikkëë tã' ikaneblöke buaë ñita. Erë iwökir kè tã' etä s'chkà kos e' kè dör ìie bua'. Es se' dör Cristo tã' ñies. Se' batsulewa Cristo tã, e' tã se' kos ser buaë ñita, ñi tsatköke buaë wes s'chkà etkè es. E' dör es, e' tã se' er diché kí iërdaë buaë wes Skëköl ki ikiane es.

²⁰ A' duulewabak Cristo tã ñita ttè èse tso' ká i' a ese kos yöki. A' kè ku'ia idikia. ¿Wes a' tö iütekeia? Ttè ese dör i' es: ²¹ Chkè sè kè kar; chkè wí kè katar, kè ñar; chkè dió kè kar. ²² Ì kos dör ñá cheke ttè ese tö, e' ertã'wa. Mik ichké one, di'yé one, etä kè itã'ia. Ttè ese kos e' dör ttè dalöiëno me' s'ditsö tö ese è. ²³ Kuaë tã ittèsö tö ttè ese dör moki, wà tã'. Wépa tso' ttè ese iütök, esepa wër wësua ie'pa tö Skëköl dalöieke buaë mokië. Ie'pa e' ò taië, suèsö tö wësua moki idir. Ie'pa wák e' we'iköke taië. E' kuëki iwër tö ttè ese dör buaë, erë kè idör es. Ttè ese kè a ì wamblak s'wák dër suluë éna ese wöklönuk yës.

3

¹ Se' shkeulekane Cristo ta ñita, e' kueki ì kos tso' ká jaì a, e' ki se' er mùwa. Ee Cristo tkër Skëköl ulà bua'kka dalöiërta' taië. ²⁻⁴ Se' duulewa Cristo ta ñita. Se' sene mokië e' tso' blëule Skëköl wa Cristo ta ñita, e' kueki kam ikkayërwa da'aie. Cristo dör sene moki se' a. Mik ie' dene ká i' a, eta ikkayërdaë sulitane a. Se' kkayërdaë ie' ta ñita olo ta' taië. E' kueki se' er múwa kekraë ì tso' ká jaì a ese ki. Kè se' er mukwa, ì tso' ká i' a, ese ki.

Wépa dör Cristo icha, esepa serke wes ie' ki ikiane es

⁵ E' kueki, ì sulu tso' ká ì a tö se' erkiöweke, ese kos olo'yó a' tö. Trë kos, sene sulusi kos, s'er me'rie trë ki, s'erbikò sulusi kos, ese olo'yó a' tö. Nies íyi kkechè taië, e' olo'yó a' tö (e' dör wes íyi diököl dalöië skëkölíe es). ⁶ Íyi ekkë kos kueki, wépa kè tö Skëköl ttè iüteta', esepa ki Skëköl kësik ardaë. ⁷ A' bak senuk ì sulu kos ese diché dikia. ⁸ Erë i'ñe ta a' kawöta ì sulu skà tso' kos e' olo'yök. Ulune, kësik, ñi wamblò sulu, ese kos olo'yó a' tö. Kè a' ñi chökia suluë. Kè a' tö ttè sulusi chökia. ⁹ A' wák dër suluë ena wes e' ser, e' olo'ya' a' tö, e' kueki kè a' kachök ñita. ¹⁰ A' wák dër suluë, e' maneñebak sene pa'alí wa. Skëköl tö a' er yuëne pa'alí. Ie' tö a' er mane'wë michoë kekraë as a' er dò wes ie' wák er es. E' uk ie' tso' as a' dò ie' sini'pa chökíe. ¹¹ Se' dör Cristo icha, e' shua s'tso' dör judiowak ena s'tso' kè dör judiowak. Se' shua s'tso' datse ká bänet, nies s'tso' kè yöule taië esepa. Se' shua s'tso' klöulewa kanè mésoie ese ena s'tso' kè dör es. E' kos kè dë' wes se' a. Cristo batamik se' kos dör ñikkëë. Ie' dör íyi ulitane tsata, nies ie' tso' se' kos er a.

¹² Skëköl tö a' shukitbak iwák a. A' batseq'itö ena a' dalër taië ie' éna. E' kueki a' ñi saú er siarë wa, er bua' wa. A' e' ówa diöshet ñi yöki. A' senú bèrë. Íyi kos panú a'

tö enaë. ¹³ A' ñi dalë'ttsó er bua' wa. Yile tö ì sulu wamblé a' ta, eta e' nuí olo'yó a' tö iki. A' nuí olo'yó a' tö ñi ki wes Skëképa tö a' nuí olo'yé es. ¹⁴ Íyi ulitane ekké tsata, a' ñi dalëritsó kekraë, e' dör iwì bua'ie. A' ñi dalëritsóke es, e' ta a' serdaë buaë ñita wes wák eköl è es. ¹⁵ Moki Skëköl tö a' klöo'bak senuk bèrë ñita wes wák eköl è es. E' kueki a' e' mú as Cristo tö a' wëttsù senuk bèrë ñita kekraë. Ñies wëstela chó a' tö ie' a kekraë.

¹⁶ Cristo ttè bló a' tö a' er a kekraë. A' ñi wöbla'ú iwa, a' ñi pattó iwa erbikè buaë kos meke Skëköl tö a' a, ese wa. Wëstela chó a' tö kekraë Skëköl a a' er a Salmo wa ena Skëköl ttsé wa ena ttsè meke Wiköl Batse'r tö se' a ese wa. ¹⁷ Ì kos weke a' tö, ñies ì kos cheke a' tö, e' kos ú ena ichó Skëképa Jesús ttò wa. Kekraë wëstela chó a' tö Skëköl dör S'yé e' a Cristo batamik.

Wes se' ké senuk ñita

¹⁸ A alakölpä wëm ta', a' wëm ttò dalöió wes Skëképa mik erblökwakpa kawöta iuk es. ¹⁹ A wëpa, a' alaköl dalëritsó, kè kësik blök iki.

²⁰ A ala'r, a' yé ena a' mì, e'pa ttò dalöió, e' wër buaë Skëképa wa e' kueki. ²¹ A iyëpa, kè a' tö a' ala'r uluwarka é ichökle as ie'pa kè eriar taië shute.

²² A' klöulewä kanè mésoie, a' wökirpa ttò dalöió kekraë. A' kanëbló buaë ie'pa a kekraë, kè dör tö mik ie'pa tö a' sueke e' è ta ie'pa wökatoie. E' skéie a' kanëbló ie'pa a er moki wa, Skëképa dalöieke a' tö e' kueki. ²³⁻²⁴ Ñermata a' dör Cristo kanè mésopa, ie' dör a' wökirpa moki. A' kanëblöke buaë ká i' a a' wökirpa a, e' ta e' ské meraë Cristo tö a' a aishkuö ta. E' kueki ì kos weke a' tö e' ú kanëë wes a' tso' iuk Skëképa wák a es, kè dör wes s'ditsö a iwè

es. ²⁵ Erë Skëköl a sulitane dör ñies ème, e' kueki wépa tö ì sulu wambleke, ese nuí ki ie' tö ie'pa we'ikeraë aishkuö ta.

4

¹ A' wépa wa kanè mésopa tso', esepa tö ie'pa saú er bua' wa yësyësë. A' éna ianú tö a' wa wökir tso' ñies, e' dör Skëképa tso' ká jaì a'.

Se' e' chò ttök Skëköl ta

² A' e' chò ttök Skëköl ta kekraë, kè ilo'yar. Mik a' ttöke ie' ta, eta' e' è wà bikeitsó, ñies wéstela chó ie' a. ³ Ye' tso' wötëule íe s'woto wé a Cristo tté buaë blëulewá kuaë, e' pakè kueki. E' kueki ikió Skëköl a tö ie' tö sa' kímú Cristo tté kí pakök buaë ká wa'ñe as kè ì tö sa' wöklö'ù. ⁴ Ikió Skëköl a tö ye' mú ipakè buaë yësyësë wes ye' kawöta ipakök es as sulitane éna iwà ar buaë.

⁵ Mik a' tso' pè' kè dör Jesús mik erblökwakpa, esepa ta, eta' a' senú buaë wes Skëköl ala'r ké senuk es. Kè a' kawö chöuk é. Kawö yóttsa kapakök ie'pa ta. Cristo tté buaë pakó ie'pa a. ⁶ A' ké ttök ie'pa ta ttè bua' buaë wa as ie'pa tö a' ttò ttsò er bua' wa. A' tso' erki ì kos chakeke ie'pa tö a' a eköl eköl, e' iütök yësyësë.

Pablo e' chéat

⁷ Tíquico tö ye' biyó cheraë a' a. Ie' dör s'yami dalër taië sa' éna ese. Ie' dör ye' kímukwak yësyësë ese. Ie' dör Skëképa Jesucristo kanè méso ye' ta. ⁸ E' kueki ye' tso' ie' patkök a' ska' as ie' tö a' a ichò tö is sa' tso', ñies as a' er kuùitö. ⁹ Ie' ta Onésimo mi'ke ñies. Ie' dalër sa' éna, ie' dör s'yami e' tkëulewá darërë ese. Ie' datse a' ká a. Ie'pa böl tö a' a icheraë tö is sa' kawö tköke.

¹⁰ Aristarco tso' wötëule ye' ta s'wöto wé a, e' tö a' shke'wémi. Ñies Marcos dör Bernabé duö', e' tö a' shke'wémi. A' a iyënetke tö ie' de a' pakök, eta ikiówa buaë. ¹¹ Jesús kië ñies Justo, e' tö a' shke'wémi. Wépa tso' ye' ta ì blúie Skëköl tso' e' kanè a e'pa shua ie'pa mañal è dör judiowak. Ye' er pablérakitö taië. ¹² Epafras dör a' wakpa eköl, e' tö a' shke'wémi. Ie' dör Cristo Jesús kanè méso. Këkraë ie' kköchöke Skëköl a a' dalërmik tö a' mú e' tkéwa darërëë Cristo ttè a kè ibikeitsè bötböt ena e' meulettsa da'aie ì kiane Skëköl ki ese woie. ¹³ Ye' wák tö ie' cheke mokì tö ie' kaneblöke darërëë a' dalërmik, ñies Jesús mik erblökwakpa tso' Laodicea ena Hierápolis, e'pa dalërmik. ¹⁴ Lucas tö a' shke'wémi. Ie' dör s'kapeyökwak dalër taië se' éna. Ñies Demas tö a' shke'wémi.

¹⁵ S'yamipa serke Laodicea, e'pa shke'ú sa' a. Ñies Ninfa ena Skëképa icha erule ñi dapa'uke ie' u a, e'pa shke'ú sa' a. ¹⁶ Yëkkuö i' aritsé one a' tö sulitane kukua, e' ukuökì ta ipatkómi a' tö Skëképa icha erule ñi dapa'uke Laodicea, e'pa a as ie'pa tö iaritsö ñies. Ñies yëkkuö patkë' ye' tö Laodicea wakpa a, e' saú mik ide a' ska' eta. ¹⁷ Ichó Arquipo a' tö Skëképa Jesucristo kanè mène ie' a wè, e' wà ú ie' tö seraa buaë.

¹⁸ Ñies ye' dör Pablo, e' tö shkene i' shté ye' wák ulà wa. Kè a' éna ichökwa tö ye' tso' wötëule s'wöto wé a. As Skëköl er buaë chö a' a.

Tte Pa'ali Me' Skököl tö Se' a
 New Testament and Shorter Old Testament in Bribri (CS:bzd:Bribri)
 copyright © 2010 Wycliffe Bible Translators, Inc.

Language: Bribri

Translation by: Wycliffe Bible Translators, Inc.

Bribri

bzd

Costa Rica

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Shorter Old Testament

in Bribri

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective

copyright owners.

2014-04-22

PDF generated using Haiola and XeLaTeX on 12 Mar 2019 from source files dated 5 Mar 2019

70b70297-578d-5d61-9b6f-3119201e28ca